

欽定剿平粵匪方略

欽定剿平粵匪方略卷二百九十二 壬戌年

二月初九日 壬戌 李世忠奏言查江浦浦口兩城

爲江北門戶與金陵一江之隔朝發可以夕至
距九洑洲不過數里 臣察看形勢必須以四千

人留守江浦四千人駐紮浦口又橋林地方逆
匪築有石營四座爲廬巢和舍之賊往來要道
必須以二千人築壘嚴防方能斷其歸路此外

如小店烏江等處均當賊衝每處亦各須一千人扼要堵防統計各處防軍總非一萬二千人不可再調大小礮船數十隻扼紮江邊以通江浦浦口糧道緣該二處甫經克復四鄉一片焦土無糧可籌必須由儀徵仙女廟邵伯等處採買糧食從江路運送其餘無處可通如此嚴密布置則清淮維揚以及裏下河一帶完善之區

俱無南顧之憂而餘來全各城與江浦浦口相
距均祇九十里亦可聯爲一氣惟臣軍除分守
滁全來並天長六合五河各城以及各要隘派
兵防守外尙有兵勇九千餘人現紮臨淮蚌埠
沐河口等處歸漕臣袁甲三暫時調遣餉極支
絀時虞飢潰若再兼籌江北一萬二千防軍之
餉實力有未逮應請

旨飭催都興阿迅速派隊赴防如萬難抽撥必須由

臣分軍防守應需糧餉軍火可否仰懇

天恩飭由江北糧臺按照一萬二千人勇數源源接濟以資堵剿至沿江口岸賊蹤飄忽靡常而九洲又四面臨江非水師不能進剿陸路官兵殊難得力卽江浦浦口糧道亦非礮船不能運送並請由江北派調紅單船二十隻小礮船數

十隻星夜駛赴浦口扼要駐紮以便調遣僞江北水師實難分撥查有總兵黃開榜所帶小礮船一百四五十隻本在天長河口防堵自天六克復後現泊高寶一帶似可移緩就急應請

飭令吳棠將前起礮船調赴浦口以通糧路而資堵剿似此水陸兼籌庶幾戰守俱有把握而於江皖軍務均大有裨益設有疏虞願甘罪戾

李世忠又奏言臣軍人數衆多前以經費支絀在於滁全境內督飭軍士將拋荒閒田開墾屯種且戰且耕復於淮河上下營運以爲養勇之費乃自苗練構釁以來淮河不通未能貿易進項毫無弁勇口糧積欠累累今又克復六合天長江浦浦口四城以及橋林小店烏江等處營壘陸續所收投誠勇丁尙有七千餘人現在道

路梗塞不能遣歸本籍若不酌量收留勢必散而歸賊此亦萬不得已之舉也刻下分軍防守費用浩繁若非另籌有著之餉源源接濟萬一軍心渙散大局不堪設想惟有仰懇

皇上天恩飭部於餉鹽之外另行指撥何省有著之餉按月籌解或於江北釐局或於淮關鹽課每月協撥銀若干萬兩以資接濟而免飢潰奏入

上命議政王軍機大臣傳諭曾國藩袁甲三都興阿
吳棠李世忠曰李世忠一軍連復江浦浦口兩城
該處爲江北門戶與金陵一江之隔距九洑洲不
過數里據該提督所奏籌畫各情尙屬詳明李世
忠之軍分守各城兼籌進剿不敷周轉若再增兵
又恐餉需難以爲繼天六本係江北切要地方仍
著都興阿撥兵駐守以便李世忠所部駐紮江浦

浦口兩城以資周轉天六屏蔽淮揚而江浦與金陵濱江對峙爲形勢所必爭此時江北兵力自應足資調撥都興阿務卽選派得力將領與李世忠商同設法守禦不許再以兵力不敷等詞一奏塞責並著與吳棠會同酌量於黃彬黃開榜等所帶兵船迅卽分撥浦口以通糧道而資堵剿江面賊氛中阻必須上下游師船合力掃蕩著曾國藩迅

籌水軍進剿之策彭玉麟之軍能否卽行駛下楊
載福假期早滿自應迅速回營著曾國藩星檄來
營俾與彭玉麟互爲策應節節進取李世忠與楚
師無爲漕鎮大隊僅隔和含並著曾國藩水陸通
籌設法聯絡以爲埽穴犁庭之計李鴻章能速赴
鎮江亦可整飭江面水陸諸軍相機進取均著趕
緊督飭辦理至李世忠部下人數衆多所費不支

自屬實在情形著吳棠於江北釐捐局或淮關鹽課督飭喬松年等速籌每月協撥李世忠軍餉銀若干萬兩以資接濟毋稍延諉若能如該提督所請於江北糧臺再行籌給該營防軍一萬二千人之餉俾揚防兵勇不須調赴天六換防更爲妥善著吳棠與都興阿妥籌辦理李世忠所籌旣自稱俱有把握設有疏虞願甘罪戾諒非徒託空言仍

著與袁甲三會商於戰守一切務臻妥善其軍情奏報等件仍應稟商袁甲三聯銜入告以一事權

初十日

癸亥

慶端奏言浙省賊氛徧地杭州旣爲

所踞必以全力犯我衢溫爲分擾江閩之計不得不通籌全局先保衢溫一面厚集勁師分道進剿庶無後顧之憂臣由省後暫紮建甯府城原因建甯係閩浙交界地方旣可顧衢又可兼

顧慮溫兩路催兵籌餉調度較靈是以暫時駐紮並不敢有意遷延也就目前情形而論陸兵應由衢州處州溫州三路進攻水師則由甯波一路進攻同時大舉使賊應接不遑方能迅速恢復現在總兵林文察一軍已令進攻遂昌並飭總兵李定太派隊夾擊先清衢處後路俟遂昌收復林文察卽由松陽直薄處州府城並令

總兵秦如虎迅由平陽移紮溫州已革道員張
啟煌號召民團爲秦如虎聲援進攻台州臣本
擬俟曾元福所募臺勇到營立即進紮三衢茲
左宗棠奉

命撫浙計必由婺源入衢已飛函與左宗棠籌商入
浙後由何路進兵分任攻剿互爲應援曾元福
之臺勇現已分隊內渡臣已派員嚴催至前派

顏青雲由海道援浙之師當時甯波未失兵力
尙多顏青雲馳往協防足資得力嗣因甯波旣
陷顏青雲獨當一面兵力過單輕進徒致債事
是以臣一面添募臺灣勇丁一面飭令副將吳
鴻源等選募水勇戰船必求事有實濟餉不虛
糜並查甯波官商置有火輪船隻飭令已革道
員張景渠設法雇借歸入閩省舟師配用尙未

接據稟復現飭吳鴻源趕爲整集卽委該副將
統帶會同顏青雲駛赴甯波攻剿並俟臺勇募
到由總兵曾玉明派員管帶配船繼進以資協
助奏入

上命議政王軍機大臣傳諭慶端曰前因杭垣旣陷
恐賊竄擾江閩諭令慶端統兵扼紮浦城以杜闌
入光澤等處茲據該督奏稱建甯北可顧衢東可

兼顧處溫兩路催兵籌餉調度較靈因仍暫時駐紮惟建甯雖可兼顧衢溫而扼賊入竄自以浦城爲切近該督仍應迅速詳定駐紮之所總以勢扼建瓴力圖攻取爲要總兵林文察一軍前據該督奏稱擬令進攻處州何以此次又令進攻遂昌該處距龍泉不遠林文明所募臺勇已到自應飭令就近進攻其林文察一軍由松陽進攻處郡如此

兩路並進則逆匪不暇分擾或可剋日攻克著慶
端咨商左宗棠斟酌辦理秦如虎一軍卽飭進紮
溫州迅圖克復台郡曾元福所募臺勇催令星夜
趨行進紮衢州由左宗棠就近調遣副將吳鴻源
水勇前諭駛赴上海著慶端探明如上海情形喫
緊仍飭該副將帶勇前往儻滬防已足敷布置卽
將甯波所置輪船交吳鴻源統帶會同顏青雲援

浙水師進攻甯郡曾玉明卽督帶續到臺勇繼進
均著照擬迅速妥辦不可延誤該督數月以來所
稱布置各情卒皆徒託空言並未見復一城辦理
亦無定見現在賊氛徧地固當步步爲營不可輕
進偵事亦宜力求實際以勦爲防該督以獲咎人
員若再粉飾誤事自問應得何罪

同日

上諭內閣曰朕奉

慈安皇太后

慈禧皇太后懿旨前因從征將士兵勇歷次陣亡者其
子孫甚可憫念諭令各原籍地方官妥爲撫恤因思
軍興以來封疆將帥之臣或懋著勲勞運籌規畫或
轉戰數省保障名城雖盡瘁捐軀所遇不同要皆誓
志滅賊終始不渝前已疊經贈官廕卹賜諡建祠飾

終之典備極優隆緬維

先帝在日論及諸臣精忠壯節時時揮淚今新政頒行
事事仰體

先帝之心諸臣以死勤事遺徽猶在能勿愴懷因諭議
政王軍機大臣查明諸臣死事情形擇其戰功卓著
忠績懋昭足以表式人倫者開單呈覽茲據查開進
呈詳加披覽實皆勲績卓然爲我國家忠良死節之

臣允宜再沛恩施以示軫念江甯將軍祥厚西安將軍扎拉芬湖廣總督吳文鎔江蘇巡撫吉爾杭阿浙江提督鄧紹良直隸提督史榮椿樂善江南提督張國樑浙江布政使李續賓江西按察使周玉衡鑲白旗滿洲副都統達洪阿京口副都統綢閣副都統佟鑑伊興額肅州鎮總兵雙來通永鎮總兵虎坤元戴文英南陽鎮總兵邱聯恩徐州鎮總兵滕家勝甯紹

台道羅澤南署廬鳳道金光筭候補道溫紹原延建
邵道趙印川記名道蕭翰慶黃濤熙候補道劉存厚
知府謝子澄均著各賜祭一壇安徽巡撫江忠源道
員江忠濟提督周天受周天培總兵長瑞長壽均係
兄弟歿於行陣長瑞長壽之父塔思哈從前道光年
間亦在喀什噶爾打仗陣亡湖北按察使李卿穀安
徽布政使李孟羣父子殉節九江鎮總兵馬濟美三

世殉難念其忠烈萃於一門尤堪憫惻湖北巡撫胡
林翼湖北提督向榮湖南提督塔齊布記名按察使
蕭啟江記名道王鑫未收全功遽就溘逝跡其功勳
卓越名播寰區至今江鄂士民猶能稱頌歿於王事
惻念良深並著各賜祭一壇以上賜祭各員著該旗
都統原籍督撫派委參佐道府大員前往各該員家
祠賜祭其有未經予諡者著禮部查明加恩予諡以

光泉壤前任內務府大臣文豐從容赴難不愧完人
並著賜祭一壇加恩予諡此外大小員弁紳團兵勇
人等爲國捐軀雖經隨時議卹恐湮沒者尙多殊無
以慰忠魂而作士氣著各路統兵大臣地方大吏訪
查具奏毋稍遺漏以備交功臣館纂入列傳用副篤
念忠節至意

臣等謹案治天下之道首在得人而禦侮折

卷之三
十三
銜尤非藉羣策羣力不可乃或未竟全功捐
軀中道良可惜也軍興以來死綏之臣指不
勝屈

朝廷飾終之典固已備極優隆我

皇上御極初元復承

懿訓查明諸臣死事情形

特命賜祭一壇仰見

眷念忠貞有加無已豈獨九原銜結凡在行間將士嚙
不思奮勉圖功共奏廓清之效哉

十二日乙丑駱秉章奏言前因石逆竄近龍山圖

與來鳳之賊合股楚師跟蹤躡剿勢將逼入川
境疊次請調臬司劉嶽昭一軍馳至川東豫爲
布置並催知縣易佩紳新募楚勇速抵夔郡以
固巖疆乃劉嶽昭一軍旣爲湖北留防施南易

佩紳所部復代楚南扼守龍山要隘不能卽至
臣以川中無兵可援西陽門戶喫緊復派候選
道章源募勇千名馳往西陽一帶調集團練據
險爲防旋據署西陽州知州王鱗飛稟報石逆
竄入來鳳縣城並分股出擾西陽兵團連日進
剿獲勝已於正月初九日隨同楚師將來鳳縣
城克復該逆盡向東南兩山奔竄臣度該逆窺

伺西陽黔江屢經挫衄勢必由利川圖竄夔郡
遂飛檄易佩紳速率全部並調湖南在籍道員
席寶田總兵周達武所帶楚勇馳赴利川所屬
之輓耳箐白水溪要隘以杜該逆奔突適據署
夔州府知府顧開第等來稟該逆前隊竄至咸
豐之忠堡一帶並有馬隊二千餘衆繞過黑洞
卡直撲利川是奉節雲陽萬縣等處在在宜防

查川中兵勇及湘果護軍各楚營正值分剿青
神鐵山滇匪果毅嚮導兩軍又復追剿周曹郭
張諸逆兵力實難抽撥現復檄催易佩紳席寶
田周達武各率所部迅速抄截賊前並飛咨貴
州提臣田興恕將前經調防彭水黔江之副將
朱凌漢總兵李有恆楊巖寶各軍如酉陽黔彭
防剿稍鬆卽改赴雲陽萬縣一帶又飛催劉嶽

昭所部亦卽星夜馳赴夔郡合力堵剿惟楚師已落賊後黔軍又難計程而至賊勢逼近除由臣咨調黔楚各軍並嚴飭夔郡文武地方官厚集團練豫爲防堵外仰懇

皇上飭下湖廣督臣湖南貴州撫臣速飭臣所調各營兼程並進並飭湖南北各路得勝之兵併力進剿合三省之師殲此巨寇不但完固川疆免

被蹂躪卽兩楚亦可一勞永逸得息征調馳逐
之煩藉以仰慰

聖廕奏入

上命議政王軍機大臣傳諭官文嚴樹森毛鴻賓駱
秉章田興恕曰石達開經楚軍擊敗克復來鳳縣
城後餘匪竄至咸豐忠堡一帶並有馬隊直撲利
川圖竄夔郡川省奉節雲陽萬縣等處在在戒嚴

川中兵力不敷恐其深入腹地自應合四省兵力
翦此巨憝著官文嚴樹森卽飭劉嶽昭一軍星馳
赴夔竭力防守並飭邊防將弁會合湖南貴州派
出各兵齊力堵剿易佩紳一軍前據毛鴻賓奏已
剋日拔營赴援夔萬著卽飭令統帶新募楚勇迅
赴夔郡並飭道員席寶田總兵周達武帶勇赴利
川一帶偵賊所向實力堵剿川疆旣固卽兩楚亦

可一勞永逸保川卽以保楚諒官文等必能洞燭
事幾不致稍分畛域也其田興恕派出之副將朱
凌漢總兵李有恆楊巖寶各軍已檄赴思渠龔灘
等處著酌量情形如秀酉黔彭防務稍鬆卽令改
赴雲陽萬縣一帶會同楚軍夾擊或酉秀防務未
可稍疏亦當分撥兵勇前往策應駱秉章亦飭川
東鎮道督率兵勇會合三省兵勇前後堵擊並嚴

飭夔郡文武厚集團練妥爲守禦毋稍疏懈

上又命議政王軍機大臣傳諭瑛棨張芾曰石達開
股匪偏近川境夔州府屬之萬縣奉節一帶處處
喫緊駱秉章現催黔楚各軍入川繞截該逆蹤跡
飄忽靡定恐因川楚各軍堵剿嚴密北向陝境老
林致剿捕又形費手著瑛棨張芾於興安定遠兩
府廳境內將毗連川東各要隘嚴密設防妥爲籌

布毋以賊蹤尙遠稍存大意

十四日丁卯曾國藩奏言臣歷奉

諭旨垂詢諸事謹分條詳對於後一曾國荃新募之
勇據報正月二十前可以招齊二十四日自湘
起程由水路東來二月底可抵安慶俟到安慶
卽令其進攻巢縣和州含山等處能破此三城
則與下游六合揚州聯爲一片毫無阻隔矣楊

載福本應於臘月銷假回營因辰沅告警地方
官紳請楊載福代守乾州廳城因此羈延至今
尙無起程確信臣已三次飛催囑其於二月回
營張運蘭前因病離營因徽州被圍催令力疾
就道卽日將抵安慶可回徽營矣一李鴻章一
軍於臘底正初招募淮勇五營另撥鄉勇數營
趕緊訓練二月可以成軍本擬由水路駛赴鎮

江因民船不能直衝賊中洋船又不肯雇載兵
勇不得已仍須從陸路行走由巢縣和含賊中
經過亦極可危應俟會國荃一面圍攻巢含李
鴻章一面傍城衝過衝至和州以下則出六合
江浦以達於鎮江毫無梗阻矣一去年攻克無
爲運漕東關等處本可乘勝直擣巢縣梁山進
圖金陵近日袁甲三一軍攻克天長六合江浦

浦口尤有直薄金陵之機方今東南糜爛臣等
孰不思直攻老巢揜渠埽穴惟用兵之道可進
而不可退算成必兼算敗與其急進金陵師老
無功而後退何如先清後路腳跟已穩而後進
所有進兵金陵之次第以臣愚計之多隆阿一
軍應俟攻克廬州而後可進曾國荃一軍應俟
攻克巢縣含山和州西梁山而後可進袁甲三

李世忠一軍應俟會克廬州守定六合而後可
進都興阿一軍應俟守定揚州浦口而後可進
彭玉麟楊載福之水軍應俟攻克裕谿口西梁
山而後可進欲拔本根先翦枝葉仍須計算各
路遊擊之師數倍於金陵圍城之師庶幾無撤
回之虞擬卽以臣議商之袁甲三都興阿等是
否有當恭候

訓示遵行一潁州圍城之賊李續宜業經奏派成大
吉蕭慶衍兩軍赴援據報於正月二十六日自
霍山起程惟繞道固始計程四百七十里途次
無米可買恐到潁不能迅速但求潁城堅守月
餘勝保救之於北成大吉等援之於南必可立
解重圍李續宜所部之兵留三支駐守湖北分
防襄陽德安麻城等處以兩支赴援潁州以一

支防守六安此外親兵帶來安慶者亦無幾矣
一謀浙之道保廣信之糧路以守衢州保徽州
之後路以攻嚴州舍此二者別無良策左宗棠
駐紮開化境內在篁岸馬金嶺等處疊次獲勝
卽日進攻遂安等縣係從衢嚴之間下手惟徽
州歙績二縣羣賊又復麕聚我方圖入浙境賊
乃圖犯江皖春夏間必爭戰不休也湖州海甯

久無信息鮑超圍攻青陽未下不能遽及甯國之境又豈能遙通湖州之信徒深憂灼耳一江蘇軍務自金山奉賢南匯川沙失守後上海已岌岌可危至今月餘歸然幸存蓋髮匪不敢與洋人驟樹大敵上海僻處東隅論籌餉爲要區論用兵則爲絕地再四思維擬暫資洋人協同保護將來果派何軍前往防守之處應俟李鴻

章到鎮陳士杰到皖再行察看奏明辦理

同日都興阿奏言接奉正月十八日

諭旨江北各軍自應進攻九洑洲並一面移營進紮
三汊河瓜州等處以資聯絡欽此查三汊河在揚
城南二十里五臺山在揚城東北一二里是大
營距三汊河不爲甚遠若袁甲三遵奉

諭旨將天六降衆移紮江浦浦口之後當派詹啟綸

帶領全部駐紮六合再酌撥數營紮於天長查
看情形應如何進剿九洑洲之賊居時臣或移
紮三汊河或仍以五臺山爲大營自當酌度形
勢相機辦理以期周密均奏入

上命議政王軍機大臣傳諭曾國藩曰據奏遵覆通
籌全局所陳進兵金陵次第本日業經諭令袁甲
三都興阿卽將戰守機宜與曾國藩商同進取仍

著曾國藩催督多隆阿速克廬州曾國荃一軍節
節進圖巢縣和含梁山以與江北江浦等軍會合
並飛催楊載福回營與彭玉麟合謀水軍進駛之
策李鴻章招募各營刻下旣以成軍若由陸路經
行巢縣和含恐多阻滯聞上海官紳有雇就洋船
該大臣卽咨商調取或隨處雇覓以利軍行總使
李鴻章之軍能速抵鎮江方爲妥善勝保督軍救

穎已抵陳州進駐槐店成大吉蕭慶衍之軍能與
南北併力援剿定當速解穎圍上海僻處海隅情
形岌岌節經薛煥奏到英法兩國協同戰守並有
米人華爾於松江與賊接仗甚爲出力惟能暫而
不能常滬瀆餉源較裕一俟李鴻章到鎮陳士杰
到皖後卽須撥派勁軍駐守以保萬全左宗棠卽
日籌攻遂安等縣從衢嚴之間進取洵合機宜其

徽州之歙縣績溪等賊屬聚及鮑超圍攻青陽是何情形仍增懸繫該撫現駐開化境內所有篁岸及馬金嶺疊次獲勝諒已奏報在途矣

上又命議政王軍機大臣傳諭都興阿曰天六等處克復揚防情形較鬆前諭該將軍派兵扼守而令李世忠將降衆移紮江浦浦口原爲揚防後路起見該將軍擬令總兵詹啟綸帶領全部前往六合

扼守另撥數營駐紮天長該總兵向稱得力自能奮勉固守已諭知袁甲三飭令李世忠將天六防守之兵移紮江浦浦口俟該提督移營後卽飭令層啟綸等前往扼紮妥爲辦理仍須由該大臣時時查察九洲爲進攻金陵要區逆賊必負嶠固守恐攻克旣不易得手而扼守尤無此兵力現據曾國藩奏稱都興阿一軍應俟扼守揚州而後可

以進取所籌頗中窾要該將軍兵力不厚若急於貪功圖勦金陵而本根未固設有意外之虞殊屬非計務當與曾國藩妥爲籌商俟和含克復後楚軍有進取之機該將軍卽當合力進勦現在惟當相機嚴防令營中將士養精蓄銳以圖大舉

上又命議政王軍機大臣傳諭袁甲三曰曾國藩奏進兵金陵之次第應俟多隆阿一軍攻克廬州曾

國荃一軍攻克巢縣和州含山西梁山袁甲三李世忠一軍會克廬州守定六合都興阿一軍守定揚州浦口彭玉麟楊載福之水師攻克裕谿口等處而後可進等語籌畫甚屬穩妥現在曾國荃新募之勇計日可抵安慶曾國藩擬俟該藩司到皖後卽令其進攻巢縣和含等處著袁甲三先期整頓軍馬一俟巢縣攻拔卽與楚軍聯絡聲勢會同

多隆阿進取廬州以期迅拔堅城肅清皖北天長
六合兩城本係李世忠招撫所有降衆自應仍歸
李世忠統帶著袁甲三迅飭該提督將天六降衆
盡行移紮於江浦浦口力籌進剿九洲洲賊匪並
一面迅速知照都興阿俾都興阿得以就近分兵
駐守天六兩城以壯聲勢而專責成

十五日

戊辰

駱秉章奏言石逆由利川山僻小徑

急趨四川石砭廳現已竄至鄭都縣下游之羊
肚溪地方搶船渡河查川省兵勇皆由分勦滇
匪勢難抽撥而劉嶽昭易佩紳之軍又爲鄰省
留防不能先期而至以固蜀疆現在俱落賊後
以致該逆乘閒闖入勢將糾合涪州一帶滇匪
進窺重慶臣帶來楚勇合之在川之湘果營統
計僅萬餘人以之會合本省兵勇專勦滇匪尙

可漸次肅清今加以石逆大股犯蜀實有賊衆
兵單之虞雖現已飛飭副將唐友耕率所部由
青神水路駛赴重慶並飭果毅營曾傳理嚮導
營張由庚兩軍合剿鶴游坪滇匪以防勾結爲
患又調已革知府唐炯帶黔勇馳赴和州相機
策應仍慮不足以遏賊鋒適接貴州提臣田興
恕來咨並致臣函因屢掛彈章皆蒙

聖恩寬大委曲成全該提臣深知愧悔力圖報效茲聞石逆擾近川界願親帶勁兵三千來川助剿並願歸臣節制伏維黔省苗教各匪勢已削弱現署撫臣韓超熟悉黔省情形辦理可期有效而田興恕旣於地方不甚相宜前在湖南帶勇又甚得力現值蜀事孔棘不得不先其所急除由臣徑咨田興恕速帶所部楚勇三千人由綦

江取道馳赴重慶仰懇

天恩飭下該提臣星速來川合力勦辦俾得早殄逆氛奏入

上命議政王軍機大臣傳諭田興恕韓超曰田興恕屢被彈劾因念其立有戰功未忍遽加譴責茲因石逆窺川亟圖帶兵自效並願歸駱秉章節制足見勇於改過洵堪嘉尙此時石逆已於羊肚溪搶

船渡河設由涪州關入重慶勢將不可收拾卽著
該提督統帶所部楚勇三千人剋日起程由綦江
取道馳赴重慶相機進剿早靖逆氛一切進止機
宜卽歸駱秉章節制所有欽差大臣關防著田興
恕於到川後卽交駱秉章封存候旨田興恕起程
後貴州提督應否派員接署並著韓超咨商駱秉
章辦理前諭田興恕遴選勇丁千名派總兵沈宏

富管帶星馳前往左宗棠軍營現在浙省軍情緊急著田興恕韓超催令該總兵迅速起程毋稍延緩

十六日己巳薛煥奏言臣因洋槍兵勇甚爲得力

取名常勝軍札飭蘇松太道吳煦督帶候補道楊坊會同華爾管帶並續挑精壯兵勇歸併練習以期日漸增多均成勁旅自正月初五初六

等日逆匪大受懲創退踞天馬山後及陳坊橋等處參將李恆嵩復挑選奮勇乘勝攻破天馬山陳坊橋等處賊營多座敗匪退入青浦城中松江情形稍鬆惟浦東賊蹤徧地距滬城祇一浦之隔其大股盤踞高橋鎮意欲斷我吳淞要隘臣飭吳煦飛調華爾帶常勝軍來滬挑選奮勇五百六十名駕坐輪船於二十三日直泊高

橋之天鐙港口豫約英水師提督何伯法水師
提督卜羅德各帶槍礮隊伍並礮船輪船十一
隻齊抵該處以礮船排泊浦濱華爾率隊登岸
首先衝入高橋英法二國隊伍列陣於鎮之西
路逆匪在環鎮各村分築巨壘六座礮船五十
餘處西而一村爲賊首巢穴遂以常勝軍徑撲
該村賊開槍礮拒敵我軍以洋槍連環轟擊副

領隊美國人白齊文撲進賊巢奪刀連刺數賊
被賊刃傷左臂仍卽裹創力戰槍隊一擁直前
立斃五百餘賊華爾同時分攻鎮東第二村第
三村賊黨且拒且退擊殺甚多尙有居中一大
村環築土垣礮臺賊匪萬餘憑險堅抗英提督
何伯帶隊馳至與常勝軍易地而陣戰酣之際
英法二國隊伍各開槍礮常勝軍轉至鎮西對

賊之礮臺隔濠力擊鏖戰兩時之久華爾冒煙
直進登時攻破賊營與賊巷戰殺賊一千五百
餘名餘賊分匿深屋我軍縱火偏賊出巢急以
洋槍環擊斃賊尤多並將鎮北一村攻破殺賊
二百餘名其鎮東之賊三千餘人棄壘奔逃華
爾督隊會合英法將士窮追三十餘里疊有斬
馘整隊回滬現探近浦各賊皆已聞風逃避臣

現派水陸各軍駐紮天鐙口等處力杜賊匪回竄並飭吳煦等籌商進取機宜一面抽調各防兵勇會合常勝軍剋期再圖剿辦以冀上慰

宸廑

薛煥又奏言據蘇松太道吳煦稟稱華爾所帶常勝軍有副總領白齊文係美理駕屬部人前歲華爾帶勇攻克松江進剿青浦曾邀白齊文

幫辦極爲出力上年設局教練本年攻勦迎旗
浜天馬山等處白齊文衝鋒陷陣勇往直前此
次高橋之役又經首先衝入賊壘裏創力戰屢
破賊營實爲教習中出色之人並據白齊文在
該道衙門具稟願爲中土編氓等情臣查華爾
宜力戎行深賴白齊文同心協助當此用人之
際合無仰懇

天恩准予收錄

賞給白齊文四品武職翎頂出自

逾格鴻施奏入

上命議政王軍機大臣傳諭薛煥曰賊匪盤踞高橋
鎮經英法水師會同常勝軍攻剿獲勝美國人白
齊文衝鋒陷陣最爲出力旣據稟稱願爲中土編
氓自應從優獎勵茲將賞給該洋人四品頂戴花

翎諭旨一道發交薛煥在滬宣示值此聲威較振
賊膽漸寒卽著薛煥督飭官軍實力堵剿無稍鬆
懈

上諭內閣曰美國人華爾營內副總領白齊文前經
隨同攻剿迎旗浜天馬山等處衝鋒陷陣此次官
軍進攻高橋白齊文首先衝入賊壘裏創力戰壘
破賊壘實屬異常出力該副總領並在蘇松太道

衙門稟明願爲中土編氓宜力戎行足徵忱悃白
齊文著賞給四品頂戴花翎與華爾一併在松江
教習兵勇協同官軍勦賊並著薛煥傳旨嘉獎

同日河南巡撫鄭元善奏言前因沈項邊防喫
重擬派副將楊飛熊一軍前赴沈項交界之槐
店駐紮相機堵剿刻下汝防喫緊復據新蔡縣
知縣韓承宣稟報捻匪楊方衡等勾結髮逆數

千並各路匪徒圍攻縣城四面共紮賊營二十餘座並於西北東北兩面築立礮臺又偷挖地道輪流攻撲自正月十四至二十三日已九晝夜未敢稍息城中糧食子藥將盡待援緊急等情是新蔡情形甚形喫重該縣毗連潁郡四面皆賊文報難通現在曾否解圍有無疏失尚未可知省防兵力祇有此數無可分撥再四籌思

惟有酌留楊飛熊一軍仍駐汝郡會同藩司張
曜進攻平輿賊壘並就近探明新蔡被圍情形
酌撥隊伍馳往援救以固門戶而重邊防奏入
上命議政王軍機大臣傳諭勝保鄭元善毛昶熙曰
新蔡被圍甚急文報不通勝保鄭元善毛昶熙自
應飭令楊飛熊一軍仍駐汝郡酌撥隊伍先解新
蔡之圍再會同張曜等軍攻剿平輿賊壘以期根

株盡拔如該副將兵力不敷援剿該大臣等卽各
添派勁兵助剿以重邊防